

陳楚贊少將畫像序贊

吾邑陳公楚贊之歸田養親也問寢視膳聽於無聲自號萊叟取老萊子班彩娛親義也承歡之暇恣意典籍臨池披誦日有常程閒或招致二三文士相與上下其議論附郭而居終歲未嘗入城市其冲淡之懷高潔之操蓋非雲中白鶴天半朱霞不足相髣髴也公少而穎特慷慨有大志有清同治間陝甘回匪煽亂蔓延及嘉峪關以外吾鄉左文襄公督師進討挈湖湘子弟以行公仗策從軍驍果冠其儕關隴肅清新疆戡定大小百數十戰無役不從艱險備嘗益自奮勵旣而隨文襄入關辦

理軍械糧餉各差旣勤旣慎克稱厥職光緒十年法越事起馬尾失守文襄出視師知公能軍命率隊拒敵旋以議和罷二十一年日本內犯劉忠誠公檄公率忠信營當前敵公秣馬厲兵誓滅此朝食已而停戰議和之命下明年甘回復叛河州西甯不守魏公光燾檄公隨同剿賊所向克捷誅暴撫良威惠大著是時公已累功擢花翎記名提督崎嶇戎馬間者二十餘年矣江南爲湘軍百戰地前後總督以公爲湘軍宿將奏統常備右軍繼統徐淮巡防馬步全軍及南洋新兵軍容整肅壁壘一新由饒州營參將擢江南督中協轉城守協遷九江鎮總兵調徐州

鎮總兵整軍經武岡有攸懈戢匪禽盜民用和悅迄武漢舉義
清廷遜位公爲南京衛戍司令官禁奸弭亂砥柱中流大總統
嘉乃懋績授公陸軍少將給予四等文虎章公以母太夫人春
秋高飄然解甲歸蓋高牙大纛之榮不足以易南陔白華之志
也昔謝太傅功高百辟心在一邱范文正白髮籌邊而戀戀於
圭峯松月卒之皆未能如其志公厯統雄師膺方面重寄得謝
事優游林下母太夫人壽近百齡康彊無恙公亦年逾六十日
侍高堂爲孺子慕遂勇退之懷極家庭之瑞古今能有幾人哉
老萊雖賢方斯蔑如矣公有畫像英姿颯爽惟妙惟肖乃叙公

事業而爲之贊俾仰止者有以徵其梗概焉贊曰

公之臨戰迅若霆雷一劍閃爍銳挫堅摧公之在軍緩帶輕裘
敦詩說禮儒將風流功銘鐘鼎澤沛江淮白雲親舍反哺歸諧
天岳山麓赤烏翱翔超園乞養公迺頡頏益州畫像記者蘇洵
謂天下事可屬斯人惟公勛業不減方平東山霖雨望切蒼生
異時再起績奮鷹揚秋容老圃晚節彌香

新田縣縣長世愚姪李先恕拜撰